

**Uunga siunnersuut: Paasissutissanik qarasaasiatigut suliarinnittarfinnik angisuunik
Kalaallit Nunaannut inissiinissaq nunani tamalaani ingerlatseqatigiiffinnut
pilerinartunngortinniarlugu naalakkersuinikkut suliniutinik sunik
aallartitsisoqarsinnaanera pillugu nassuiaasioqqullugit Naalakkersuisut
peqquneqarnissaannik Inatsisartut aalajangiiffigisassaattut siunnersuut. Nassuiaat 1.
januar 2027-utinnagu Inatsisartunut agguanneqassaaq.
Inatsisartunut ilaasortaq Jørgen Rosbach, Demokraatit**

pillugu

Sanaartornermut Ataatsimiititaliap

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliap suliarinninnermini uku ilaasortarai:

Inatsisartunut ilaasortaq Justus Hansen, Demokraatit, siulittaasoq
Inatsisartunut ilaasortaq Gerth Mikaelen, Naleraq, siulittaasup tullia
Inatsisartunut ilaasortaq Jørgen Rosbach, Demokraatit
Inatsisartunut ilaasortaq Nivi Heilmann Efraimsen, Inuit Ataqtigiit

UKA2025-mi ulloq 16. oktober siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Kalaallit Nunaani paasissutissanik qarasaasiatigut suliarinnittarfinnik inissiinissaq nunani tamalaani ingerlatseqatigiiffinnut pilerinartunngortinniarlugu aallartisarneqarsinnaasunik politikikkullu sunik suliniuteqarnersut Naalakkersuisut nassuiaasioqquneqassasut siunnersuummi pingaarnertut anguniagaavoq.

Siunnersuutip Inatsisartunit siullermeerneqarnera

Aalajangiiffigisassat siunnersuummut siunnersuuteqartup anguniagaa
tapersorsorluarneqarpoq aammalu siunnersuutip siullermeerneqarnerani annertuumik
oqallisigineqarluni.

Siunersuummi siunertarineqartoq inuiaqatigiinnut aningaasaqarnikut ineriartornermut pingaaruteqartorujussuuvoq, taamaattumillu aningaasaqarnitta nukittorsarneqarnissaanut

ineriartortinneqarnissaanullu sunik suliniuteqarniarnerlutik Naalakkersuisut nassuiaasioqquneqarput.

Naalakkersuisut akissuteqataanni oqaatigineqarpoq paasissutissanik qarasaasiatigut suliarinnittarfiit nukissamik annertuumik pisariaqartitsisut, ilaatigut systemit atortuisalu ingerlaannarnissaannut innaallagissamik annertuumik atorfissaqartitsisarmata. Unammilligassat ilagisinnaasaat tassaapput kabelinik imaatigoortunik amigaateqarneq.

Naalakkersuisut allannguutissatut siunnersuummik imaattumik saqqummiussipput:

”Tasersiami Tarsartuullu Tasersuani erngup nukinganik nukissiorfiliornissamut periarfissanik misissuisitsinermi suliariumannittussarsiuussilluni annertuumik suliaqareernermi misilittagarilersimasani Naalakkersuisut nassuiaammik suliaqaqqullugit peqquneqassasut. Nassuiaammi periarfissat unamminartullu selskabit nunanit allaneersut paasissutissanik qarasaasiatigut suliarinnittarfinnut pilersitsinissaannut pilerisunnerulernissaannut tunngasuussapput. Nassuiaat Inatsisartunut agguanneqarsimassaaq 1. januar 2027 nallertinnagu”.

Allakkatigut apeqqutit

Siunnersuummik suliaqarnerminut atatillugu atugassaminik apeqqutit arlallit akineqarnissaat pillugu Naalakkersuisut Siulittaasuannut ataatsimiititaliamit qinnutigineqarpoq. Ataatsimiititaliap apeqqutaat Naalakkersuisullu Siulittaasullu akissutaasa assigi uani isumaliutissiisummi ilanngusaaq 1-itut ilanngunneqarput.

Maannakkuugallartoq kabelini imaatigoortuni attaveqaatit atuuttut naapertorlugit naammattumik piginnaasaqartut paasissutissanik qarasaasiatigut suliarinnittarfinnik pilersitsinissamut tapertaasinnaasut, tamannali piviusumik paasissutissanik qarasaasiatigut suliarinnittarfiit pisariaqartitaannut apeqqutaassasoq Naalakkersuisut nalileraat, Naalakkersuisut akissuteqaataat tunngavigalugu ataatsimiititaliap maluginiarpaa. Kabelini imaatigoortuni nalignnaasumik attaviliineq atornagu kiisalu nunap inissisimaffiani pissutsit unammillernartoqartitsisinnaasut pillugit qarasaasiami atortunut immikkoortortanik annertusaanissamik pisariaqartitsisoqarsinnaasoq Naalakkersuisut ilanngullugu oqaatigaat.

Taamaattumik kabelini imaatigoortuni pioreersuni imaqortussuseq aamma piginnaasat pineqartuni taakkunani killiliisussatut nalilerneqanngimmata, immikkut kabelinut imaatigoortuni pilersitsinissamut paasissutissanik qarasaasiatigut suliarinnittarfiit angisoorujussuit naatsorsuutigineqartut, Naalakkersuisut pasissutissiisutigigaat ataatsimiititaliap aamma maluginiarpaa.

Siunnersuutip aningaasatigut kingunerisassai

Aalajangiiffigisassatut siunnersuutip piviusunngortinnerani aningaasatigut allaffissornikkullu

kingunerisassai siunnersuummi tunngavilersuutitut allassimasussaapput Inatsisartut suleriaasianni §33, imm. 1 naapertorlugu.

Siunnersuummut atatillugu siunnersuutip piviusunngortinnerani aningaasatigut kingunerisassai AC-fuldmægtigip ukiumut aningaasarsiai 500.000 koruunit angullugit aningaasartuutigineqassasoq siunnersuut naapertorlugu naatsorsuutigineqartoq ataatsimiititaliap maluginiarppaa.

Ataatsimiititaliap siunnersuummut oqaaseqaatai

Aserfallatsaalinermit aqutsinermullu aningaasartuutit qaffasittussaasut aammalu paasissutissanik qarasaasiatigut suliarinnittarfiit annertuumik nukissamik pisariaqartitsisut kiisalu suliassami pingasuunissaannik pisariaqartitsisoqassasoq ataatsimiititaliap maluginiarppaa. Tasersiaq aamma Tarsartuup Tasersuata eqqaanni erngup nukinganik nukissiorfiit paasissutissanik qarasaasiatigut suliarinnittarfinnik allanillu aamma atulersitsinermi nukissaq pisariaqartitsineqartoq matussusersinnaalluarpaat.

Inatsisitigut sinaakkutini ataatsimoortumik misissueqqissaarnernik suli peqartoqanngimmat aamma paasissutissanik qarasaasiatigut suliarinnittarfiit Kalaallit Nunaanni inuussutissarsiornerup iluani nutaamik pilersitsisussaammata Naalakkersuisut paasissutissiissutigigaat ataatsimiititaliap ilanngullugu maluginiarppaa. Kalaallit Nunaata piginnittuunissaa aamma nunanit allanit aningaasaliisussanut sinaakkutit kiisalu EU-mi malittarisassat atuuttut ilanngullugit, qarasaasiatigut isumannaallisaaneq paasissutissanillu illersuineq ilaatigut misissueqqissaarnissamut ilimasaarummi ilanngunneqarnissaat Naalakkersuisut isumaqartut ataatsimiititaliap pingaarutilittut maluginiarppaa.

Innuttaasunut pilersuineq ullumikkut annertunerusumik aaqqissugaammat nukissiuuteqarnerup iluani aningaasarsiutigineqarnissaata ineriartortinneqarnissaa pisariaqartoq Naalakkersuisut oqaatigigaat ataatsimiititaliamit aamma maluginiarneqarpoq. Nunanit assigiinngitsunit aningaasaliisoqarsinnaaneranut annertunerusumik qitiutillugu soqutiginnilersitsissasoq ataatsimiititaliap maluginiarppaa.

Paasissutissanik qarasaasiatigut suliarinnittarfinnik angisuunik pilersitsinissamut inuiaqatigiit aningaasarsiuteqalernissaannut sinaakkutit suli aalajangersaavigineqannginnerat, Naalakkersuisullu erngup nukinganik angisuunik tuniniaasinnaalernissamut tunngatillugu Naalakkersuisut “naalakkersuisunit-tigoriaannartut-iluseq” atussallugu aalajangersimagaat ilanngullugu maluginiarneqarpoq. Paasissutissanik qarasaasiatigut suliarinnittarfiit taamatullu eqqarsaatigineqartut matumani ilanngullugit sumiiffinnut tunngatillugu aammalu inuiaqatigiit aningaasaqarnerannut oqimaaqatigiissitsisoqassasoq ataatsimiititaliap naatsorsuutigaa.

Akilerartarnermut tunngatillugu naammattumik aningaasaliissutinut taamatut ittunut tapersersuinissaq, nunanit allanit pasissutissanik qarasaasiatigut suliarinnittarfinnut aningaasaliisoqarnissaanut atatillugu maluginiarneqartussat immikkoortut iluanaaruteqartarnermut- aamma isertitanit akilerarutitut tunngasut Naalakkersuisut oqaatigigaat ataatsimiititaliap naggataatigut maluginiarppaa. Sukumiisumik

misissueqqissaartoqarnissaanik ilimasaarinerup pissutsit taakku ersersissagaat
ataatsimiititaliamit qilanaarineqarpoq.

Ataatsimiititaliap inassuteqaatai

- Ataatsimiititaliaq isumaqatigiittoq allannguutissamik imaattumik saqqummiussiumavoq:

“Tasersiami Tarsartuullu Tasersuani erngup nukinganik nukissiorfiliornissamut periarfissanik misissuisitsinermi suliariumannittussarsiuussilluni annertuumik suliaqareernermi misilittagarilersimasanik Naalackersuisut nassuiaammik suliaqaqqullugit peqquneqassasut. Nassuiaammi periarfissat unamminartullu selskabit nunanit allaneersut paasissutissanik qarasaasiatigut suliarinnittarfinnut suliniutinullu annertuunut assingusunut pilersitsinissaannut pilerisunnerulernissaannut tunngasuussapput. Nassuiaat Inatsisartunut agguaanneqarsimassaaq 1. januar 2027 nallertinnagu”.

Taamatut oqaaseqarluni isumaliutissiisummillu allassimasutut paasinnilluni matumuuna ataatsimiititaliap siunnersuut aappassaaniigassanngortippaa.

Justus Hansen
Siulittaasoq

Gerth Mikaelson
Siulittaasup tullia

Jørgen Rosbach

Nivi Heilmann Efraimson